



*Kamis, 18 April 2024*  
**Ogen: Perb. Rasul -rasul 1:6-9**



*Embun Ngeligeni LA*



Lit piga-piga kali isingetken kerna embun i bas Pustaka si Badia. Embun e banci miser i bas inganna si pemena nari kabang ku ingan sideban. Bas Perdalanan bangsa Israel ipadang gurun, iarak-arak Tuhan ia tupung suari ras berngi. Tiang embun encidahken maka Tuhan lit i tengah-tengah bangsaNa. Arah embun nari Tuhan ngerana man Musa kerna si man dahinkenna i bas ngaturken bangsa Israel. Embun e nuriken maka Tuhan e ringan ras bangsaNa. I bas ingan sideban embun pe nuriken kerna kebadian Dibata. Ise pe la ngasup natap ayoNa, sabap ia tuhu-tuhu badia ras ermulia. Embun e pe ipake Tuhan jadi alat transportasi. I bas Masmur 104:3 ikataken maka embun ijadiaken Tuhan jadi geretaNa. Jesaya 19:1 : pedas me Tuhan reh alu ngersak embun.

Renungenta wari enda nuriken maka embun ngeligeni Jesus tupung iangkat IA ku surga, e maka tupung itatap ajar-ajar pe ku datas lanai iidahna. Embun e pe jadi alat Jesus si maba IA nangkih ku surga. Tuhu, peristiwa kenagkihen Tuhan Jesus ku Surga e pelin-pelin kuasa Dibata. Isaksiken ajar-ajar maka kerina si lit i bas doni enda tunduk ku bas perintahNa. Embun pe banci ngelai IA. Teridah maka kai si lit i bas doni enda lit i teruh tapak-tapak nahe Jesus. Kuasa si ituduhkan Jesus e me si mpelimbarui ajar-ajar reh tek-na man baNa. Kuasa e mereken semangat guna ersaksi man kerina jelma maka Jesus e tuhu-tuhu anak Dibata si erkuasa nelamatkan doni enda.

La terjeng man ajar-ajar Jesus, man kerina kalak si tek pe ibereken kuasa guna tetap erberita kerna Jesus e ku sekelewetta. Bali ras embun ndai, kita pe ipake Jesus jadi alatna guna encidahken kuasaNa e arah kiniteken ras perbahanennta. Hubungan si mehuli ras Jesus e mahan bana kita ngasup erbahan mehuli man ise pe. Kuasa Jesus e mpengasup kita nggeluh bujur, benar ras badia ilebe-lebeNa. Terdauhen, kuasaNa e jadi gegehta mabai kalak guna rembak ras tek man Kristus.